

# UVODNA RIJEČ

## EDITORIAL

Poštovani čitatelji,

Čast mi je i veliko zadovoljstvo obratiti Vam se u ime *Saveza udruženja građana geodetske struke Bosne i Hercegovine* (u daljem tekstu: *Udruženja*). Ove godine slavimo značajnu godišnjicu. Naime, 2012. godina je 45. godina u kojoj geodeti Bosne i Hercegovine čitaju *Geodetski glasnik* (do 1987. godine *Glasnik*). Osnovna zadaća *Udruženja* je održavanje duge tradicije izlaženja našeg glasila za koje možemo reći da je jedino glasilo naučno-stručnog karaktera iz oblasti geodezije i srodnih naučnih disciplina u Bosni i Hercegovini. Od 2011. godine urednički odbor *Geodetskog glasnika* čine i ugledni naučnici iz inostranstva, što je za *Geodetski glasnik* i naše *Udruženje* izuzetna čast. Ovom prilikom im se zahvaljujem na njihovom pristanku da budu izuzetno značajan dio našeg tima. Zajedno sa našim sponzorima, učinili smo sve da podignemo kvalitetu našeg glasila i iskreno se nadam da ćemo održati taj kvalitet. Uzor su nam bili brojni časopisi iz inostranstva, a ovom prilikom posebno bih spomenuo *Geodetski vestnik* iz Republike Slovenije, čija kvaliteta i angažman glavnog urednika prof.dr. Antona Prosenca mogu biti uzor mnogima koji se bave ovom djelatnošću.

Svakako treba spomenuti da je, kao rezultat rada nekolicine članova, svjetlo dana ugledala web stranica našeg *Udruženja*. Za detalje možete pogledati [www.suggsbih.ba/geodetskiglasnik](http://www.suggsbih.ba/geodetskiglasnik). Ovom prilikom se zahvaljujem poštovanim kolegicama i kolegama na njihovom velikom entuzijazmu, a njihova skromnost je osnovni razlog zbog kojeg ne spominjem imena. Naravno, za dobrobit naše domovine i geodetske struke ništa nije teško. Najveća nagrada za sav trud je realizovan novi broj našeg glasila kojim se uistinu ponosimo, kao i što veći broj posjeta našoj web stranici. Na pomenutoj web stranici smješten je kompletan opus *Geodetskih glasnika*. Postavljanjem svih brojeva *Geodetskog glasnika* na internet (od broja 1 do broja 41), omogućeno je da svi zainteresovani naprave uvid u sve do sada objavljene brojeve časopisa.

I na kraju bih pozvao sve zainteresovane kolegice i kolege da nam šalju svoje radove, čije će objavljivanje predstavljati značajnu referencu, obzirom da je u toku uvrštavanje *Geodetskog glasnika* u relevantne međunarodne baze podataka. Također bih pozvao zainteresovane kompanije da pomognu redovno izdavanje *Geodetskog glasnika*, a zauzvrat bit će im omogućeno objavljivanje reklame na adekvatnom mjestu u časopisu ili na web stranici *Udruženja*.

***Doc.dr. Admir Mulahusić, dipl.inž.geod.  
Predsjednik Saveza udruženja građana  
geodetske struke Bosne i Hercegovine***